

第 十 九 種

# 舊德堂醫案提要

舊德堂醫案一卷清雲間李脩之先生遺著也其書中所記之案上自公卿下逮販賈所載多怪異之病所用皆奇特之法其及門諸子早已付刊西秦田華臣先生序文亦云已有刻本惟乃時家刻書籍印送親友未易普及海上中醫雜誌按期選載閱者多以不得急窺全豹爲憾裘君吉生特將舊藏抄本刊行以副同道先覩爲快之望亦卽中醫雜誌社選載流傳之意也

## 舊德堂醫案序

嘗聞炎帝之澤壽世而資生堯舜之政仁民而及物利濟天下其揆一也然愛民者以親親爲先壽世者以老老爲務元晏先生云人受先人之體有八尺之軀不知醫事此游魂耳雖有忠孝之心慈惠之念君父危困赤子塗地何以濟之聖賢所以精思極論而盡其理耳余嘗有志於斯奈周旋皇路勞瘁簿書每歎元晏高風有慚蘇僊奇行也及承乏雲門觀風海邑有修之李君者年富而學博養邃而識純其決病也如洞垣之照其投劑也若大還之丹無論沉痾怪病卒能返本回真仁風翔洽遐聲稱久矣余之所不能去於心者辛丑季秋余將入覲

彤廷會家君患泄神疲形瘁已成痼疾恐不起其如會同大典已任北山之後報政長征曷紓南顧之憂自度此身不忠不孝何自立於天地間也幸李君以

補天之功幹旋造化展指上陽春而沉寒忽散潑壺中甘露而元氣頓光起家君於萬死一生之危依然堂上俾不肖於燕山楚水之遙還瞻膝下微李君德澤不及此余啣恩有素銘德無涯聊仿古人式廬下車之敬旌其堂曰今日東垣以著培杏弘林步武乎易水師弟也繼而視膳失節泄瀉復作病入膏肓痛難身代雖先子盡其天年而李君德意之厚與道望之隆深足追述也孰謂和緩才名有遜於秦晉兩君哉余故爰載始末附諸簡端以誌感云若夫活人功用自有筆舌可紀是刻特其一班耳

西秦田元愷華臣氏書於雲間署中

## 自叙

紀古稱漈腸胃漱滌臟腑割皮解肌挾脈結筋此鍊精盪形之術超倫希世之神其法不可攷矣三代以降湯液初興方論始備十劑以準規矩七方以明繩墨補瀉因乎虛實寒熱合乎時宜症有真假憑脈而施治治分從逆臨症而審機變化生克若易道之無方虛實奇正如兵家之有紀故一症有一定之論一方有萬變之能未可寒熱兩歧攻補互似也非審脈驗症辨明定治何能幹旋造化之意耶東坡云脈症難明古今所患至虛有盛候大實有羸狀疑似之間生死反掌佩服斯言戰兢自懼猶恐遺訓在耳貽羞地下乃奮然鼓志研求靈素考據百家受知常世十有餘年雖無回生起死之功稍有吹枯振槁之用或舍症而取脈或舍脈而取症或對症以定方或因方以立論楮陳墨跡累案盈几矣及門二三子請付剞劂用廣聞見於是不揣愚鄙聊錄一二自知雕蟲

舊德堂醫案序

四

小技不合大道然而他山之石可以攻玉狂夫之言聖人擇也則此刻或有道之所取裁乎敢以就正

雲間李修之甫識

## 小叙

余讀史記倉公治案凡十有餘人歷疏病狀備陳方論未嘗不歎功多也蓋人稟天地之大德參精神之化機有生必有病者六淫與九氣相干有病必有治者七方與十劑相濟故鍼灸砭石創制於千古湯液醴醢垂訓於萬年司命重權由來尙矣第病有所因人人自殊症有傳變種種不一始末變遷之異寒熱虛實之分陰陽消長愈幻而愈化攻補從逆愈出而愈奇三指之下安危反掌一匕之中生死攸關必醞釀丹書研精靈素乃能入室升堂耳惟吾師修之李夫子天資穎悟家學淵源飲上池之水洞隔垣之照刀圭施而沉痾頓起丹丸投而僵仆回生九峯三泖咸化爲壽域春臺矣翊也企仰儀型親炙道範幸大治鑪錘啓小子韓賸書紳明教蓋已有年二三同志慮照示之不廣也屬余立案以記之用是敢竭班見敬陳片言雖學海泓深難以蠡測龍門多士何藉管

窺然山高在望安敢怠荒名論在茲願叨筆舌卽見聞所及記述大概上自名公巨卿下逮賈夫牧豎其間怪異之病奇特之方或還生起死或養氣守眞時而培補陽和如陰霜見日時而調元滋水若甘露澍霖圓融活潑總不外回春之澤臨機應變盡皆成利濟之仁庶天下後世知吾師活人功用上接乎倉公也至若著述藏於金匱編刻秘於玉函上擷萬卷之書下振千秋之鐸此吾師入神之妙用余未有知安敢窺其萬一耶

申江唐廷翊百拜書

511.00  
478  
2-11



# 三三醫書第一集總目

11 10 9 8 7 6 5 4 3 2 1

溫熱逢源  
醫事啟源  
醫經秘旨  
醫病簡要  
醫階辯證  
喉科秘訣  
癰科全書  
重訂時行伏陰芻言  
村居救急方  
醫蠱燃犀錄  
外科方外奇方

22 21 20 19 18 17 16 15 14 13 12

欽論經旨  
臨症驗舌法  
沈氏經驗方  
重訂痧疫指迷  
重訂靈蘭要覽  
凌臨靈方  
推蓬寤語  
舊德堂醫案  
內經辯言  
新刊診脈三十二辯  
專治癰痧初編

33 32 31 30 29 28 27 26 25 24 23

評註產科心法  
本草衍旨  
先哲醫話  
蘇州世醫陳氏幼科秘訣  
秋瘧指南  
宋本備急灸法  
醫源  
馬培之醫案  
本事方續集  
曹仁伯先生醫案  
南病別鑑

35 28





# 舊德堂醫案

## 三三醫書第一集第十九種

雲間李用粹修之著

門人唐玉書翰文記錄

紹興裘慶元吉生校刊

申江鄒邑侯子舍仲夏患瀉精神疲憊面目青黃因素不服藥遷延季秋忽眩暈仆地四肢抽掣口斜唇動徧體冰冷面黑肚縮六脈全無署中幕賓通曉醫理各言已見或曰諸風掉眩法宜平肝或曰諸寒收引理應發散議論紛紜不敢投劑延予決之曰脾爲升陽之職胃爲行氣之府坤土旺則清陽四佈乾健乖則濁陰蔽塞此自然之理也今泄瀉旣久冲和耗散所以脾元下脫胃氣上浮陰陽阻絕而成天地之否故卒然仆倒所謂土空則潰也况肝脾二經爲相勝之臟脾虛則木旺肝旺則風生故體冷面青歪斜搐搦相因而致也若誤認風寒的候而用發表之方恐已往之陽追之不返矣宜急煎大劑參附庶爲治

本合署驚訝見予議論嚴確乃用人參一兩熟附二錢生薑五片煎就灌下一  
二時手指稍溫至夜半而身暖神甦能進米飲後以理中補中調理而安  
文學陸元振經年伏枕足膝枯細耳輪焦薄形容憔悴歷訪名醫俱用四物地  
黃湯反覺胸膈凝滯飲食減少自謂此身永廢而心猶未慊延予商治診兩寸  
關俱見沉滯獨尺部洪大重按若絕此腎虛精耗髓空骨痿之徵也蓋腎者作  
強之官也居下而主陰氣藏精而充骨髓者也故腎旺則精盈而肢節堅強腎  
虛則髓竭而膝膕軟弱王太僕云滋苗者必固其根伐下者必枯其上今坎水  
不能灌溉經絡滋養百骸宜乎耳輪焦薄足膝枯細也內經所謂腎氣熱則腰  
脊不舉足不任身骨枯髓減發爲骨痿端合此證若徒事滋陰恐用草木不能  
驟補精血反壅滯陽氣以致中脘不舒痿蹇艱難耳必用氣血之屬同類相求  
兼以報使之品直抵下焦譬之天雨溝渠盈溢滂沛河澤奚慮隧道不行足膝

難步耳疏方用人參白朮當歸地黃茯苓肉桂鹿茸龜甲萎蕤牛膝等重劑數帖而稍能轉舒百帖而愈

嘉定孝廉陸佑公長子童年發熱偏嘗涼藥熱勢更熾晝夜不減復認陽明熱證投大劑白虎禁絕穀食致肌肉消瘦漸致危困迎予往治見面色枯而不澤脈現細數力斷大虛之證速用甘溫之藥庶可挽回佑老駭曰皆言外感寒熱無間內傷寒熱不齊今發熱晝夜不已而反言內虛者必有確見願聆其詳予曰陽虛晝劇陰虛夜劇此陰陽偏勝因有界限之分今脾胃並虛陰陽俱病元氣衰殘陰火攻冲獨浮肌膚表雖身熱如焚而寒必中伏况肌肉消鑠脾元困憊也徹夜無臥胃氣不和也面無色澤氣血不榮也脈象無神天真衰弱也此皆不足之明驗若禁用五味則胃氣益孤專服寒涼則生氣絕滅宜晨服補中益氣湯加麥冬五味以培資生之本暮服逍遙散以疏乙木之鬱兼佐濃鮮之

品甦胃養陰庶元神充而虛陽內斂也令先飲豬肺湯一碗當卽安睡熱卽稍減遂相信用藥服十劑而精神爽快調理經年服參數斤乃獲全愈

常鎮道尊陳公久患下血甲辰春召予調治診得六脈安靜右尺重按稍虛此命門火衰不能生土土虛榮弱精微下陷而成便血之候蓋土爲生化之母隄防下氣者經曰營出中焦又曰氣因於中中者脾胃也爲生氣生血之鄉升降濁之職故胃盛則循經之血灑陳於外脾強則守榮之血滋養於中皆賴少火生氣耳若元陽旣虧離虛無以生坤坎滿無以養艮使脾胃衰殘而清陽不升轉輸失化而陰血不統宜乎精華之氣不能上奉辛金反下滲庚大腸也當用甘溫之劑培中宮之虛升陽之品提下陷之氣庶生長令行而陰血歸藏方以補中益氣加阿膠醋炒荊芥數劑而安

保定文選張魯彥少年登第縱恣酒色患便血四年午晨各去一次諸藥雜投

劑多功少延予調治診其脈象兩手浮洪斷爲腎虛火動之候蓋血乃精化精充而血始盛陰隨陽動陽密而陰乃固房勞太過則真水虧而虛火獨發元氣不足則閉藏弛而陰不固也遂以熟地山萸山藥石斛歸身白芍秦朮阿膠等煎成調棉花子灰二錢空心溫服數帖乃愈

庠生陸符九夫人係董文敏公之孫女也懷孕三月忽崩湧如泉胎墮而胞息脹悶昏沉發熱譫語上視見鬼面黑流涎已三日矣此皆瘀血灌滿胞中上掩心肺故惡證畢現治法須分先後用肉桂歸尾澤蘭香附紅花牛膝元胡索煎成調失笑散去其胞中垢穢使不上升繼以參耆芎歸肉桂助其傳送庶或有救如方修服神思稍清覺痛陣連腰恍恍如下墜將鵝翎探入喉中一嘔而胞下脹悶諸苦若失

協鎮王公生長薊北賸理閉密癸卯秋謁提台梁公於茸城乘涼蚤歸中途濃

睡覺惡寒發熱緣素無病患不謹調養過食腥葷日增喘促氣息聲粗不能安枕更汗出津津語言斷落不能發聲延予商治六脈洪滑右寸關尤汨汨動搖以脈合證知爲痰火內鬱風寒外束正欲出而邪遏之邪欲上而氣逆之邪正相搏氣湊於肺俾橐籥之司失其治節清肅之氣變爲擾動是以呼吸升降不得宣通氣道奔迫發爲肺鳴一切見證咸爲風邪有餘肺氣壅塞之徵若能散寒驅痰諸病自愈乃用三拗湯（三拗湯麻黃不去根節杏仁不去皮尖甘草生用按此方治感冒風寒咳嗽鼻塞麻黃留節發中有收杏仁留尖取其能發留皮取其能濇甘草生用補中有發故名三拗）加橘紅半夏前胡一劑而吐痰喘緩二劑而胸爽臥安夫以王公之多慾誤認丹田氣短用溫補之品則膠固膚腠客邪焉能宣越頑痰何以渙解故臨症之時須貴乎諦審也

歙商吳維宗年將耳順忽然染吐血嗽痰晝夜不安醫見年邁多勞誤投參耆

遂覺一線穢氣直冲清道如烟似霧胸間隱隱而疼喘急不臥闔戶悲泣特遣  
伊姪遠顧蓬門具陳病概并言伊子幼齡倘成沉疴何人撫育深爲慘惻予憫  
其懇切細爲審度知水乾龍奮焦灼嬌臟將見腐肺成癰所以咳咯不止蓋金  
水一氣水火同原乾金既可生水坎水又能養金惟源流相濟則離燄無輝如  
眞水涸流則相火飛越俾清虛廓然之質成撥攘溷濁之氣况乎甘溫助陽愈  
傷肺液宜壯水之主以鎮陽光使子來救母而邪火頓息也方以生熟地黃各  
二錢天冬麥冬各一錢五分茯苓紫菀川貝枯苓瓜蒌霜甘草節各一錢二劑  
而烟消霧散喘息臥安以後加減不旬日而嗽痰俱止  
相國文湛持在左春坊時患左足下有一綫之火直冲會厭燔灼咽嗑必得擡  
肩數次火氣稍退頃之復來或用補中益氣加肉桂服之更甚求治於家君脈  
兩尺虛裏知非實火奔迫乃虛炎泛上然虛症之中又有脾腎之分脾虛者氣

常下陷法當升舉腎虛者氣常上僭又當補斂今眞陰衰耗孤陽無依須滋坎之陰以抑離之亢乃爲正治方以熟地四錢丹皮山萸各二錢麥冬錢半五味三分黃柏七分牛膝一錢煎成加童便一杯服四帖而虛火乃退左足遂涼

參戎王麗堂夫佞佛長齋性躁多怒腹脹累年歷用湯丸全無奏效延予治時腹大臍突青筋環現兩脅更甚喘滿難臥此係怒氣傷肝坤宮受制之證前醫但知平肝之法未知補肝之用所以甲膽氣衰冲和暗捐清陽不升濁氣不降壅滯中州脹勢更增殊不知肝木自甚則肝亦自傷不但中土虛衰已也法當調脾之中兼以疏肝之品使肝木調達則土自發育耳擬方用蒼朮白朮各錢半白芍廣皮香附茯苓各一錢肉桂木香生薑皮各五分服後頓覺腹嚮脹寬喘平臥安後加人參調理而全瘥

休甯汪振先夫人受孕八月胎前勞瘵肉削肌瘦環口鰲黑舌色紅潤飲食如



常六脈滑利狀若無病予曰九候雖調形肉已脫法在不治所賴者胎元活潑眞陰未散綫息孤陽依附丹田譬之枯楊生花根本已撥胎前尙有生機恐五十日後雖有神丹總難回挽蓋分娩之時榮衛俱離百節開張况處久病之軀當此痛苦之境恐元神無依陰陽決絕僅陳軀殼而生氣杳然豈能再延耶越二月果子存母歿

青溪何伊祥之內患吞酸已二十餘載矣因病隨年長復加悲怒胸膈否塞狀若兩截食入卽反肢體浮腫治者非破氣消導卽清痰降火投劑累百未獲稍安邀予治之左三部弦大空虛右寸關沉而帶澀乃苦寒傷胃清陽下陷之徵也蓋胃司納受脾主運動胃虛則三陽不行脾弱則三陰不化致倉廩閉塞賁門阻滯奚能化導糟粕轉輸出入乎况氣者升於脾而降於胃運用不息流行上下者今胸膈氣噎乃氣虛而滯非氣實而滿如誤認有餘之象妄施攻伐之